

# Абу Наср Аҳмад ибн Муҳаммад



13:30 / 13.06.2021 1462

Беназир имом, ҳофиз Абу Наср Аҳмад ибн Муҳаммад ибн Ҳусайн ибн Ҳасан ибн Али ибн Рустам Бухорий Калободий. 323 йилда таваллуд топганлар.

Калобод – Бухоро маҳаллаларидан бири.

Ҳайсам ибн Кулайб Шоший, Али ибн Муҳтож, Абу Жаъфар Муҳаммад ибн Муҳаммад Бағдодий Жаммол, Абдулмўмин ибн Халаф Насафий, Муҳаммад ибн Маҳмуд ибн Анбар, Абдуллоҳ ибн Муҳаммад ибн Яъқуб Ҳорисий ва буларнинг табақасидагилардан ҳадис эшитганлар.

Дорақутнийнинг ёшлари бу кишидан катта бўлса ҳам, «Ал-Мудаббаж» китобларида, шунингдек, Ҳоким, Жаъфар ибн Муҳаммад Мустаффирий ва бошқалар ҳам бу кишидан ҳадис ривоят қилганлар.

Мустаффирий айтадилар: “Билишимча, бугунги кунда Мовароуннаҳрда Калободийдан ҳофизроқ киши йўқ”.

Ҳоким айтадилар: «Абу Наср Калободий котиб, яъни ривоятни ёд олсалар ҳам, уни ёзадиган, фаҳм ва маърифатлари гўзал, «Саҳиҳи Бухорий»ни мукамал биладиганлардан. Мовароуннаҳр, Хуросон, Ироқда ҳадис ёзганлар. Шайхимиз Абул Ҳасан Дорақутнийнинг у кишининг фаҳмлари ва ҳадисни билишларидан рози бўлганларини билдим. Калободий мутқин (ривоятни мукамал қилувчи) ва ҳар бир ҳадис калимасини ўз ўрнига қўювчидирлар. 398 йил жумодул охир ойида вафот этганлар.

Мовароуннаҳрда у кишининг ўринларини босадиган олим қолмади».

«Саҳиҳи Бухорий»нинг санадида келган ровийлар тўғрисида китоблари бор.

Силафий айтадилар: «Абу Наср Калободийнинг «Ал-Иршод фи маърифати рижолил Бухорий» китобларини Исфаҳонда бизга Холид ибн Абдулвоҳид Тожир, у кишига Абдулмалик ибн Ҳасан ибн Сиёвуш Козруний муаллиф Абу Наср Калободийдан эшитиб, хабар бердилар».

Бизга Ҳасан ибн Али, у кишига Жаъфар Моликий, у кишига Силафий, у кишига Ҳамд ибн Умар, у кишига Юсуф ибн Ҳусайн, у кишига ҳофиз Аҳмад ибн Муҳаммад ибн Ҳусайн, у кишига Аҳмад ибн Наср Бухорий, у кишига Ҳусайн ибн Муҳаммад Қуммий, у кишига Абдурахим ибн Ҳабиб Бағдодий, у кишига Бақийя ибн Валид хабар берганлар: «Авзоъийнинг: «Сафарда жун кийим кийиш суннат, муқимликда бидъатдир», – деганларини эшитдим».

Бир жамоат Бухоро фақиҳи Маҳмуд ибн Аҳмаддан изн шаклида бизга хабар берди. Уларга Ҳасан ибн Мансур Қозихон, у кишига Ҳасан ибн Али ибн Абдулазиз ёздирганлар. У кишига амакилари Маҳмуд (Қозихоннинг боболари) айтганлар. У кишига ҳофиз Умар ибн Мансур ёздирганлар. У кишига ҳофиз Абу Наср Калободий, у кишига Абу Жаъфар Муҳаммад ибн Муҳаммад, у кишига Яҳё ибн Усмон ибн Солиҳ, у кишига Исмоил ибн Исҳоқ Ансорий, у кишига Мисъар, у кишига Атийя Абу Саъиддан хабар берганлар: «Набий соллаллоҳу алайҳи васаллам:

كُنَّا الْمَلَائِكَةُ نَلْعَقُ تَلْعَقُ مَلْعَقًا بِلَطْنٍ

«Ким илм талабида бўлса, унга фаришталар салавот айтиб туради...» – дедилар».

Ҳофиз Аҳмад ибн Муҳаммад ибн Момо айтадилар: «Абу Наср Аҳмад ибн Муҳаммад Калободий: «Саҳобийларнинг кийимларини ва сифатларини гўё уларни кўриб тургандек билардим. Султоннинг хизматида котиблик билан шуғулланганимдан сўнг булар хотирамдан кўтарилди», – дедилар».

**«Машҳур даҳолар сийрати» китобидан**